

浙志便覽

陳鳳誥
題籤

浙志便覽卷之二

化州李應珏玉



甯波府序

甯波居省東北、自省經蕭山會稽餘姚慈谿至三百六十里、西北自奉化甯海至台州府城三百九十里、轄邑七、附郭曰鄞縣、山自四明發脈、至鎮甯爲一郡之主、左支至龍山、與定海大陳相對、右支自太白至阿育王山而止、海外諸峯、其餘脈所渡也、北三十里曰慈谿縣、水自餘姚來、至百丈亭分爲二派、一往郡城、一貫縣治、西九十里曰奉化

縣自郡溯南渡江直抵邑城與甯海相接東北六十里曰
鎮海縣三面距海縣東南十里之梅山江通大嵩海東南
百一十里之黃埼江通蛟門海縣之西河通蟹浦海皆要
港也東南百九十里曰象山縣三面距海南曰大睦東曰
錢塘西南曰東門錢塘北達定海東門南通溫台皆商舶
所經由蛟門東渡百二十里曰定海廳卓立海中延袤四
百餘里老城三面倚山最易受敵惟新築土堤可守海口
自五奎山東歷十六門循山而西至螺頭門水深無底不
可堵塞由象山踰海而東爲石浦廳孤懸海中去昌國十


里生連一山與洞下門相對可以扼守郡水以鄞江奉化江最大統名甬江鄞江出餘姚西南歷上虞餘姚過慈谿抵府城西與奉化江合流至鎮海東一里之寶山峽出海奉化江出縣西南下流分數派一至府城一至鎮海海口自峽出北曰招寶山南曰金雞山金雞錯出海中石磯曰小金鷄與招寶安遠砲臺石磯相對除兩旁淺水四十丈外行船深處僅六十丈潮漲水深二丈七尺潮退深二丈法事於此釘樁沈船費銀三萬餘兩其外兀峙於口門者曰虎蹲山又出不兩里曰游山爲七里嶼再出則爲蛟門

爲金塘西南入鄞西北達紹爲全浙要處海中諸島南自
衢山岱山至定海東由劍山長塗至普陀俱距定海八十
里東出洛伽門有東霍山與盡山南北爲犄角普陀南自
崎頭至昌國外有韭山吊邦大小諸山處處皆可寄碇道
光間英夷之役先攻石浦以礁險改攻定海自竹山門入
營於海中五奎山繞吉祥門攻東港浦曉峯嶺城陷遂進
撲鎮海先破城外招寶山俯攻城內而入遂連陷郡城餘
姚慈谿分擾奉化髮逆之亂賊由奉化連陷郡屬各邑渡
蛟門攻定海本道張景渠率團敗之渠旋遣人塞賊招寶

各壘礮孔合洋人復鎮海進白沙拔郡城馳至太平橋收復慈谿扼泗門鎮進圖紹興賊復由紹踰陳公嶺陷奉化間道陷慈谿撲郡城乃再合洋人收復署法將勒伯勒德爲副將設常勝軍守之甲戌法人之役我澄慶馭遠兩輪船壞於石浦敵遂猛攻鎮海時大吏惟鎮之以靜堅守塞港之議凡砲臺皆以蒲包裝土加厚一二丈使彈入不能開花又於內河梅墟兩岸堆築土堤各十里遮護砲臺以固後路相持五旬一省晏然事後復於小金雞及南岸之小港口笠山增築堅廠砲臺多置三百磅子鋼砲用活千

斤柱可以旋轉洞穿十里外之鐵甲船并於金雞至小港
濱海兩面及笠山前面厚堆土堤栽種竹柳遮護有事笠
山大台外可捍蛟門金塘內可顧虎蹲招寶爲第一重門
戶招寶威遠臺專擊游山虎蹲爲第二重小金鷄安遠守
護椿石爲第三重梅墟並顧育王嶺牆下潭爲後路此則
海防近事也郡境延袤不及三百里歲征地丁三十四萬
九千餘兩海關數萬近增洋關洋藥又各百數十萬釐局
八處歲收絲茶百貨又四十七萬餘府學二十六名郡守
通判教授調導經歷四明驛丞兼巡檢同城甯紹台道兼

管浙海關各一提標五營共兵二千一百有七城守營兵三百五十八近日大校場駐勇四百八十名尤爲得力甯口自通商後貿易甲於浙省民之因洋人爲利者以億計而外夷教黨亦日盛倘嚴袒庇之公法以遏教民之煽誘鼓舞役夷之人使自行精習洋人技藝并造造器之器則不爲我害而我可收其利矣前薛本道福成設格致書院月課諸生以洋務更於此鼓勵之豈小裨哉



鄞縣序

鄞縣爲附郭首邑。方廣六十餘里。征地丁七萬七百餘兩。漕項六千餘。學額三十五名。令典諭訓縣丞鄞江司巡檢。清泉場大使大嵩場大使提督暨中軍參將守備各一。千總二。把總三。左營遊守各一。存城把總三。水師右營遊守各一。千二。把三。前營駐大嵩遊守千把各一。存城千總一。水師後營遊一。駐應家棚守一。存城千一把三。城守營都守存城千把各一。城內釐金總局。知府辦酒捐業捐近萬。總局督同小委員辦江東船貨局抽釐十三萬二千餘。聞

貨局三萬八千餘北岸洋廣局八萬有奇北門外灣頭局
九萬四千餘皆聽縣辦濠河局五千餘佐貳辦邑西南五
十里爲錫山鉛山產錫鉛七十里爲灌頂山宋人採鐵處
鄞江在邑城東北南接奉化江西接慈谿江合流經桃花
渡抵鎮海出口邑東七鄉水利以東錢湖爲最距城二十
五里周廻八十里四岸爲堰七西七鄉水利以廣德湖爲
最距城十二里宋時曾佃爲田西七鄉皆成廢地官山堰
在邑西南五十里唐邑令王元偉因四明諸水自邑出海
叠石爲塘以捍鹹潮內渠引灌城鄉復引入城內爲日月

硤
石
考

湖分洩於南北行春保豐二硤江東硤閘在城東過浮橋
一里亦所以隔米行河使不與江潮相接者大嵩塘距邑
東南八十里則雍正間李撫衛因是處港口田地日闕建
上游六閘引山泉灌溉而於港內金溪橋築滾水壩以禦
鹹潮者也邑爲通商口岸貿易亞於上海輪船赴滬一晝
夜往返逐日開駛腳價僅半洋因洋人爲利者比於粵東
洋界巡捕充以衛安勇隸本道管無滬上桀驁氣乙酉法
警有議撤衛安勇以節餉者薛本道福成力持之乃止邑
中人物自漢二黃公唐賀知章宋陳禾輩代有名人明末

萬季野兄弟極文學之盛道光初封宋翰林晁說之爲孚
惠侯尤以神道顯近日郡中科目參全浙之一而邑十居
其八若太史陸廷黻張嘉祿洪家滋童祥熊諸賢皆浙東
人傑也

慈谿縣序

慈谿在府西北六十里方廣百里東至鎮海六十里西至
餘姚七十里北渡海至海鹽以海中桑嶼牛山爲界征地
丁四萬二千四百餘兩漕項三千餘學額二十五名令典
諭訓縣丞松浦巡檢鳴鶴場大使城守營把總各一兵四
十名三七市千總一兵十四名邑水曰慈谿江源出餘姚
太平諸山至百丈亭歧爲二派一大江由車溪廐厯西渡
經郡城北至大浹口入海一小江從東南貫邑城由驄馬
橋出東郭其李磧蓄洩東西直河之水爲慈鎮兩邑水利

所關已丑邑紳擬於其左另建閘橋以工代賑善舉也邑中鹽館上年被鄉民打毀幾釀鉅案幸崧中丞駿仁厚持大體故株連者少攷左侯定浙各處設立鹽行分上中下三則歲納錢七十五三十千不等無人開行則官爲代辦專利者因壟斷焉然邑與甯紹毘連當左侯時紹屬肩鹽以八百斤爲一引每斤抽錢八文視各項季鹽住鹽減二三倍蓋以其地隨處可以產鹽可以運銷操之過急不但貧民無以爲生卽奸徒亦難於防範也上與民爭利而必欲計及錙銖是治絲而棼之矣邑中人物宋黃伯啓以

理學稱康熙時姜宸英西溟文名冠世年七十成進士特
旨以一甲第三人用而近日楊庶常家驥陳大尹康祺
昆玉其著者也

